

三台縣志卷七

人物志二

孝友

晉

李釗 〔十六國春秋〕李釗字世康廣漢人也祖旦字欽宗光祿郎中主事父毅字允剛歷寧州刺史加龍驤將軍封成都內侯釗世秉儒學有格望以父任爲謁者僕射除壽林侯相不就爲尙書外兵郎晉光熙三年毅爲叛夷所攻疾病困於窮城不能討戰上表請援時李雄寇蜀都救兵不得進釗聞父阨表求赴難馳至牂牁夷斷道停住交州以寧州城中無穀父疾病未知吉凶遂不食穀惟茹草首尾三年得至寧州父已喪文武復副釗領州府事懷帝乃除釗平寇將軍領安夷護軍西

三台縣志

卷七

一

三台新民印刷公司代印

夷校尉大得衆心及王遜爲寧州刺史表釗爲朱提太守尋遷越雋治南廣以禦雄數破雄軍殺大將樂初雄玉衡十三年太傅驤與任回分兵攻朱提越雋城陷被獲尋自蜀逃歸遜仍以釗守越雋雄復遣驤及任回攻之釗自南秦與漢嘉太守王載并力來拒戰於溫水敗績遂以二郡迎降釗到成都雄待遇甚厚朝廷儀式喪紀之禮皆決於釗命太子班以師禮事之

梁

李慶緒 〔南史孝義本傳〕李慶緒字孝緒廣漢人也父爲人所害慶緒九歲而孤爲兄所養日夜號泣志在復讐投州將陳顯達仍於部伍白日手刃其仇自縛歸罪州將義而釋之梁天監中爲東莞太守丁母憂去職廬於墓側每慟嘔血數升後爲巴郡太守號良吏累遷衛尉封

安陸縣侯益州一二百年無復貴仕慶緒承恩至此便欲西歸尋徙太子右衛率未拜而卒

趙拔扈 〔南史孝義本傳〕趙拔扈新城人兄震動富於財太守樊文茂求之不已震動怒曰無厭將及我文茂聞其語聚其族誅之拔扈走免亡命聚黨至社樹呪曰文茂殺我兄今欲報之若事克斫樹處更生不克卽死三宿三柝生十餘丈人聞傳以爲神附者十餘萬旣殺文茂轉攻旁邑將至成都十餘日戰敗退保新城求降文茂黎州刺史文熾弟襄陽人也

唐

趙烟一作炯 〔新唐書〕趙烟涪城人數世同居天子旌表門閭賜粟帛復賦稅

三台縣志

卷七

二

三台新民印刷公司代印

曹少微 〔新唐書〕曹少微郫縣人事親居喪著至行天子旌表門閭賜粟

章全益 〔新唐書孝友傳〕章全益梓州涪城人少孤爲兄全啟所鞠母病全啟割股膳母而愈及全啟亡全益服斬衰斷手一指以報不畜妻僮僕處一室賣藥自業世傳能作黃金居成都四十年號章孝子卒年九十八

明

蹇衡 潼川人建文元年舉於鄉性至孝母歿葬祭一遵家禮後官都水主事居父暨繼母喪哀毀廬墓事聞旌表

李應槐 字庭三潼川人父母早歿叔母涂氏育之涂死應槐自外歸泣曰叔母養我以生我不能送其死奈何遂觸棺而死

李祥 潼川人性至孝舉萬歷癸卯鄉試以母老不仕母卒始授蔚州知
□州有政聲致仕歸居鄉謙謹年八十卒

李長芳 潼川人萬歷戊午舉人居家孝友授寶雞縣教諭及門七人皆
成進士

覃鳴球 潼川州貢生明末寇亂被擄父含斗爲賊所殺迨十年鳴球歸
里遍訪鄉鄰得父骸葬之廬墓側哀慟而卒 并舊通志

湯虺 潼川人正德十六年進士終養歸母強之仕授溧陽令多惠政歲
饑賑活數萬人化諭海寇爲良民以母憂歸廬墓終身不仕惟潛心著
述有春秋易簡發明二十卷石池集二十卷 蜀人物志

李如金 潼川諸生明末獻賊屠戮金與母潛大山中金出覓食母被執
金遂挺身出求代母死同匿者止之金曰吾母可生我死何憾竟至賊

三台縣志

卷七

三

三台新民印刷公司代印

所引頸受戮隨欲殺母旁賊憐之曰此孝子也乃釋其母

萬谷暘 潼川人字律吹崇禎丙子舉人性純孝母傅氏病篤暘朝夕侍
奉衣不解帶一夕母夢天門放榜上有三字皆細星攢成旁一人持以
示母曰此萬思壽母覺謂暘云吾病當愈汝必獲售數日病果愈次年
暘登鄉薦平居敦行博學淡泊寡營有古人風後學宗之著浪遊集歸
與集嚙語集共三十卷年八十卒

王旌熊 潼川人父喪家貧甚竭力事母母嘗病篤服藥不愈割股救之
病乃瘳鄉人咸以孝稱 并舊縣志

清

楊先憲 舊縣志作光憲 字式毅潼川人歲貢生敦行博學幼以孝聞母閔氏病
卒值獻逆亂粗具殯殮及蜀平始盡喪葬禮哀毀如初廬墓三年鄉人

劉子釗 潼川人性至孝母病羸八載釗減食廢寢未嘗離左右遇慶弔去卽速反不敢外宿一宵凡母所目經處必淨掃以待母曰爾得毋過勞耶釗曰母在兒在母死兒殉敢以勞辭及母卒哀毀骨立殯葬如禮既畢曰今日我可以從母於地下矣遂抑鬱逾月卒卒之日復囑曰我死當以麻衣麻冠入殮其篤孝出於至性如此

李來御 字荀友潼川州貢生碩德懿行爲鄉黨法事親尤篤孝嬰慕終身雍正十二年州牧徐遵義旌之曰孝友家風邑人譚行義爲作傳

李純修 三臺武生年十五母病篤割股以進母得愈父患足疾性急躁稍不遂意輒加鞭撻修和顏順受鄉黨稱孝焉

杜國謩 太學生屢試棘圍不售性剛直篤於孝友撫周歲孤侄隆桑成

三台縣志

卷七

四

三台新民印刷公司代印

立弟兄爭產已出受分田解之卒年六十八

文邦位 三臺人有孝行幼爲繼母所逐依山結廬家徒四壁與妻作苦無怨每以旨甘奉養未嘗稍懈母感之愛甚己出後弟貧不能自給乃迎母同居事葬盡禮子廷煥入邑庠

曾中魁 三臺人少孤事母孝家貧傭工以奉甘旨未嘗稍缺母有疾必哭泣告天願以身代母年七十卒魁哀毀欲絕終身不茹葷酒

王偉 三臺人兄弟同居每朔望必講誦陰隲文一過闔族環聽五六十餘卒至今子孫咸知禮讓焉

吳曾行 字敏佳三臺人性孝友奉先必敬雖顛沛未嘗廢禮弟某已析居矣後業蕩無以自存曾行慨然曰葛藟猶庇其本根况手足耶復合

爨與己業之半孫國琳登戊辰賢書人謂孝友之報云

并通志

李果泰 來御仲子由增貢兩舉賢良方正力辭終養不起乾隆二年詔賜六品階知府費元龍悉其賢每延訪時政多所建白嘗語人曰我閱人多矣若徵士李果泰能養親志守親身述親事廣親義善行醇備吾無間然識者以爲知言

李光 字世清邑人事母盡孝務得懽心五十年不少衰母歿廬墓三年不御酒肉道光末旌表

姜懷連 字子潔邑人少失怙恃弟懷璋繼母出性敏而幼或勸之賈連曰我愚已失學繼書香者在弟矣乃質衣執贄使就學璋弱冠遊庠從師百里外連由家負米之館師謂城市伊邇何自苦爲連曰欲其念我發憤耳屢戒弟曰我力耕汝勤讀庶家聲可振毋以一衿自足師咨嘆

三台縣志

卷七

五

三台新民印刷公司代印

稱賢兄焉復命璋肄業省垣往來數載必親送一日澤竭得魚母嘆曰惜璋離家遠不得嘗此連聞卽擇二尾遺璋一日夜行三百里璋感泣益發憤乾隆丙午舉賢書官梓潼教諭璋長子文相亦列邑庠

宋維垣 邑附貢生年十二父學仲歿遵母訓勵志勤學十八入庠奉母以孝聞生平樂道人善親族子弟必勉以敦品讀書貧不能讀者捐資助之多所成就與妻田年皆八十餘歲

周珣 字含玉邑貢生動履修潔居親喪哀毀骨立三年杜門謝客未嘗訾笑教訓生徒各與孝經一本今日誦一遍其言曰孝爲百行原於此或虧雖讀破五車無補也一時從學之士莫不以孝行相勉

李敦肅 字維恭邑人家甚貧父庠生聯萼遊學廣西多歷年所肅日夜思慕苦無力迎養知縣邵良贈以金肅始跋涉迎歸

謝生財 字濬甫初爲廣東平遠人年十九奉母命入蜀尋父父無歸志復迎母來川居邑西巍鼎山生平事親孝課子嚴好善樂施不求聞達嗜韓昌黎文年屆八十有七猶吟誦不輟子孫科第繼起人稱積善之報

譚曾長 字白山歲貢生提督行義曾孫也父景嶧母楊氏俱早卒事繼母極孝晨夕不離左右性純質樂善雖居城非公不見長吏卓然有澹臺氏風

張啟昂 邑人庠生文敏之父嘉慶五年教匪猝至全家避去昂獨以母老病依依無敢離賊脅之出索金帛馬匹悉無有欲殺之告以母故賊舍之去越月賊復至昂依母如故賊曰此孝子也戒左右勿犯同時鍾兆乾亦偕母潛匿爲賊所獲賊曰何不遠逃乾曰吾母老病吾不忍離

三台縣志

卷七

六

三台新民印刷公司代印

請先殺我無傷吾母賊並釋之賊雖無良純孝亦可格也

龔定魁 邑人性純孝嘉慶庚申舉家避賊宜君山砦破魁奮力負母走賊止之曰走卽死魁曰老母在何畏死賊以爲孝與之旗餘賊不敢犯家人十餘口因以獲免

羅章 邑庠生家貧嗜學親隣饋以飲食必留奉母終身色養不衰林登蕃 邑太學生事繼母極孝撻楚無所怨下氣怡色人以爲難張仕才 字彥臣歲貢生性端謹能義讓母嚴氏年九十二事之孝敬如一日母卒哀毀骨立祭葬如禮閭里稱之

趙廷相 邑貢生樂施謹飭終身孺慕人以老萊稱之年八十遭母喪廬墓百期親友苦勸乃歸年九十二卒

陳之瓏 字映奎邑庠生姿稟剛方見聞博洽事親篤孝葬祭一本家禮

不信浮屠說家徒壁立介然自守爲里黨師

徐起鵬 邑廩生博學篤行授徒養親三十餘年無懈爲里黨法

楊廷棟 幼失恃父娶繼母廷棟事之益恭父性剛嚴母稍不如意卽欲遣去廷棟泣諫乃止鄉黨以孝謹稱

何文星 邑人事親能得歡心母歿營葬外作二石槨欲與弟同厝其孝友如此

李昌典 邑人母性褊急昌典委婉承順靡不悅豫母適貧乏親族家輒先饋酒肉恐人慢其母致母不樂也母卒喪葬盡禮

譚祖德 邑人家貧以醫術供養親病彌延三四載拮据調理尋相繼歿咸豐元年場被火焚殆盡惟祖德肆無恙人以爲孝感焉

張德輔 性孝友幼失怙母常患目鞠於兄嫂及長兄與析爨輔時迎嫂

三台縣志

卷七

七

三台新民印刷公司代印

劉至家奉養如母二十餘年敬禮不衰

呂權寅 邑北鄉人家貧母文氏嬰風痺侍養五年衣不解帶母欲遊曰背負出入及病瘥隆養備至

劉綱紳 邑北鄉人事母孝子常進亦得祖母歡咸豐末滇匪來犯綱紳負母逃母時年八十餘綱紳亦六十有奇矣賊平後綱紳病沒棺不能動母泣曰有爾子常進奉我爾勿如此棺乃動母後病篤謂人曰我子綱紳時在我側

馬思富 邑人事瞽母承奉盡道母或怒欲笞之則跪引手受杖後母子以壽終

趙光清 字鑑塘邑庠生性孝友弟以浪遊破產旣析居清以硯田所入代爲償債毫吝色族黨賢之

趙天友 邑人家貧奉母務得歡心或有所憂長跪請罪母喜乃起後母子年皆八十餘

林忠惠 邑人傭工養母衣食未嘗菲薄母憐其重累將幼子出繼異姓惠積資贖回後母以壽終惠兄弟亦皆白首猶合爨焉 并舊縣志

王洪舉 字殖菴邑北鄉人性純孝父歿後母老而盲凡扶持舉動奉盥授衣必躬親之子婦請代役弗許曰母子也可頃刻離耶後母以百歲終洪舉擗踊哀毀必欲葬於堂曰吾不忍吾母在荒山也族戚固止之乃葬於廬側建百齡樓朝夕登望復刻木肖像以祀之定省如生時家富好施歲大饑發困賑之邑立鄉學又慨輸千金爲倡孫紹芬丁酉拔貢

諶義塋 邑南鄉人性孝友母患風痺扶持抑搔先意承奉夜不解帶日

三台縣志

卷七

八

三台新民印刷公司代印

不出里門者三年及卒哀毀葬祭盡禮晚歲手錄勸善書百餘卷卒年七十四

陳其珍 字清亭道光癸卯舉人有至性大得父母歡母病晝夜侍奉十餘年不懈及歿哀毀廬墓再易寒暑父泣諭始歸父疾祈以身代尤善體親志撫育伯叔兄弟之孤苦者俾得成立同治初旌表

黃欽德 字厚安太學生性爽直嗜學七歲父歿涕泣偕母至綿州尋柩歸葬事母盡歡母年九十五猶孺子慕及卒葬祭如禮廬墓累月年七十五卒光緒乙未得旌

趙芳煦 字春亭績學士也事繼母極孝父性僻嗜酒醉輒詬詈煦愉婉無少忤或長跪請罪不避箠楚家固貧乏而父之酒資每日無缺

魏倫明 字敏之邑歲貢生端莊純質敦篤內行母病刲股以進人無知

者偶露臂見癍痕問之則權詞以對光緒癸未舉孝廉方正召試授六品銜平居講學宗程朱教人尤娓娓不倦有胡安定風焉

羅遇良 字顯臣邑諸生性正直寡言笑侍父母病衣不解帶者四年母年七十九時病瘡如鼓勢甚危遇良泣禱願以己壽益親母病尋愈越十二年瘡復作以九十一歲卒遇良哀毀備至每食設位於席奉酒食如生存至服闋乃已

陳科信 字協孚事親孝家貧業負販供甘旨弟某適黔挈母膳金去科信遂獨養母毫無慍色尤廉介重義嘗與邑某交易歲終會計忘百餘金悉指數還之其不苟如此 并新府志

謝崇善 尾火鄉人年二十父卒家貧脚踏執藝得微資悉以養母兄卒姪幼一切喪費皆獨任之

三台縣志

卷七

九

三台新民印刷公司代印

沈再發 官斗山木匠也家寒習藝得貲即買甘旨供母出必告反必面雖夜歸亦必問母安否命睡始睡若遠不能歸即先與母說明然間日或數日必歸省雖風雨及夜深亦必至母前細問不問心不安如此數十年無怠

王祖才 父連山性嚴急稍不如意詈責隨之才事之終無慍色母何氏失明曾禱神覓方治之歲餘復明才年七十九歿

王興元 邑北人四歲時母董氏孀居家貧甚力耕養母凡外間所應得菜肉皆懷歸以奉母董氏晚年撓風疾兩載未愈元衣不解帶湯藥親嘗旨甘不缺因母病調養日久負債百餘金人代憂之元聞嘆曰親病果能愈銀錢何足惜母歿哭泣之哀感動四鄰

歐陽本貴 牛金鄉人家貧極父病無錢療治母下堂張姓時貴年四歲

後十餘年張姓亦貧如洗其母乞食四方貴聞之訪尋得實負其母回每傭工得錢必買肉奉之次年母患風疾臥床三年貴借錢奉母備極辛勤母死哀痛有加年五十八卒

謝用佶 號健芳濬甫子性至孝從其仲兄吉圃孝廉受業詩書之暇侍父母益虔受知於學使陳揭榜時得吉圃京師凶聞哀痛幾不欲生戚友咸勸乃就覆試畢卽欲北上扶襯父母堅不許及襯歸營喪盡禮時以爲難適母劉孺人有疾用佶晝夜侍湯藥衣不解帶病垂危中夜祈天願減己壽以益母壽及卒哀毀幾至滅性祭葬盡禮自丁艱後益竭力事親不敢暫離因置業構訟拖累連年每終夜涕泣以不克事親爲憾辛未父卒用佶哀毀骨立居喪皆法文公家禮廬墓六月不茹葷不赴筵每朔望徒步十餘里詣墓悲哀至久不衰

三台縣志

卷七

十

三台新民印刷公司代印

勾正鳳 字德齋祖籍鹽亭父魁江母氏張有子二以少子鳳出繼於勾族之家三台者故鳳遂家於邑桃子園鳳生有至性以三鹽相距百里不得時問所生年既長徒步回籍省視則父歿兄夭墓草已豐饑饉流離生母不知所適悲愴欲絕念昔人有萬里尋親事爰歸辭其所後父母囊勸善書往來講演於嘉陵諸地鳳善辭令所至村姑媿婦集而聽者相環乘間物色其母冀倖遇久之至雙合場有傳鄰娶一窶婦係鹽亭人亟與偕往審諦之果母也惟相別十餘霜初錯愕不相識及言鳳生年月日俱符又云吾子幼蹈湯火腹有癍痕袒而示之不虛乃相持大慟里中何孝廉目擊其事鳩金餽贖並作序以寵其行鳳乃奉母歸三台時撫父已卒兩母耦居無猜鳳事之如一光緒間旌如例

湯三聘 字華夫號覺亭少勤學事母極孝人無間言以歲貢授儀隴縣

教諭生十男二女壽九十四歲

廖士廉 邑文生事親孝遇母病篤調治弗愈醫云必嘗其糞味方知病之真相廉無難色因嘗糞投藥遂瘳

郭徵睿 劉家營人母魏氏生二子繼母姜氏育一子睿長兄早卒事親能得其歡心凡飲食衣服器具無不隨親所欲朝夕問寢視膳三十餘年如一日及父歿事繼母尤謹雖讀書不多而依依孺慕足爲鄉黨矜式焉

劉金壽 丙辰冬月朔夜三台場不戒於火延燒四十五家波及劉屋瞽母五旬餘壽負母呼天不顧貨物燎原頓息一屋獨存人共稱爲孝感云

蘇延慶 尾火鄉人少時父蘇光明母龍氏因歲旱遠出數載無音延慶

三台縣志

卷七

十一

三台新民印刷公司代印

弟兄成立乃爲負販小商以尋親至龍樹場稍獲利遂寄居於此後適綿竹購貨突遇道人自言尾火鄉人問姓字卽其父問母所在言昔到永川賣與貴州賈人矣跪請歸養弗應倏亡去民國壬子聞父歿於孝泉同弟往查寔購地葬於孝子姜詩墓側刊碑誌之甲寅又命弟往黔尋母半載歸明年繼父熊某躡至於是弟兄分養之十餘年無間言李華久 字子瓊性樸誠母患痢溲溺無常穢濁漬床褥家人服事多倦子瓊歷數十晝夜未嘗離左右甚至躬浣其中踰久而不厭弟兄五人子瓊行四仲兄大不友於弟屢見齟齬子瓊反躬自責不敢咎仲一日備禮物跽謝兄曰弟誠不是非兄不是言未畢淚涔涔下其兄亦淚涔涔下仲兄遂翻然悔悟和好如初

謝廷舉 字琴山張月鄉人恩貢生父尙玉續娶遺腹生廷舉行三少孤

家落異母長兄早逝無嗣廷舉將所有產業全讓仲兄携妻子別居以館爲家又以次子章成續長兄後章成長亦教讀平武聞藍犯潼恐母受驚星夜馳奔三百里回家奉親遠避後亦遊泮母年八十八終

姜大昌 昆季三人家甚貧父孝國母周氏均年邁議分居各佔壓錢二十釧負債四十餘釧二老輪流供養奈昆季菽水難給大昌同妻周氏傭工針黹以供晨昏後母病癱瘓便溺需人大昌奉食除穢三年亦染瘟疫昏憤時恍惚若有神令人送歸醒時舉家哀已一日矣自此勿藥而痊後父母歿衣棺祭葬皆獨力任之

黃欽德 字厚菴拔貢黃沐顯之父善事父母溫清定省至老不衰雖盛怒下聞親命必和顏悅色以娛其心光緒十五年奉旨旌表入孝弟祠何紀齡 邑西貢生工文善書縣令以志任希文扁額贈之親有疾衣不

三台縣志

卷七

十二

三台新民印刷公司代印

解帶藥必先嘗默祝神祇願代親病親歿哀痛幾至殞命廬墓三載鄉人稱純孝焉

葉明昌 字熾堂箕水鄉人性孝友父亡母衰老辛酉藍大順入境明昌侍母側不去藍義之弗加害及聞子侄被擄告母曰弟之子猶子也願冒險求釋遂趨藍營曰若輩幼無能爲汝役請以老夫易藍重其義胥送之還同母弟明盛同居數十年友愛備至胞弟之子開運字文軒卽藍所擄乙亥遊泮明昌子開端開勳亦遊泮食餼

趙維垣 劉家營人父思泰乾隆間武進士任廣西游擊繼娶陳氏生子父母鍾愛異常垣事繼母如母待弟如同胞親有疾垣自侍湯藥臥不解衣父性剛嚴偶有拂意卽楚撻維垣流涕伏地認過後分居其弟財產房屋皆逾於垣垣坦然處之終無慍色垣妻姜氏壽九十餘其家

繪有五世同堂圖以傳後

陳正己 字近光三合鎮人咸豐十一年口月藍逆犯境其父文祥命家人各逃避而近光不忍遠離偕父夜奔突遇逃兵執其父髮辮以矛柄捶之血盈衣臂近光向前奪賊手刃連擊之不釋又以計給賊大呼從行者救命賊驚而釋之近光扶其父回家光緒八年八月父年六十八病垂危近光偕諸昆弟疏懇竈君願減壽一紀益父齡病果愈光緒十九年父年八十終適符一紀之數

唐時燮 邑西人少有至性數歲喪父母哀毀如成人其事繼母以孝聞繼母歿時異母弟時煊方六歲夙有風疾數月一發二日卽昏瞶不省人事燮與其妻羅氏輒抱持之風止始釋手爲延名醫診治數年始愈時其伯高梧君無嗣欲撫煊爲子燮夫婦辭曰僅一弟不忍出繼且令

三台縣志

卷七

十三

三台新民印刷公司代印

人謂我懼分財也其友愛如此

唐樂安 邑貢生世居邑西性至孝父歿廬墓三年生平未嘗道人過失喜怒不形於色有爭其田壤者不與較後爭者自查契券確非己有踵門謝過指還界址但笑受之無異言也至其豐於財而能散矜卹孤寡猶小節也前清邑令張公贈以忠厚傳家匾額八十終於里廬

傅宗剛 字浩然幼時祖母李常嬰疾病剛日侍湯藥及光緒丁丑病危甚剛齋戒沐浴刺指血作疏祈減己年以增祖母年又於竈神位前默禱病果愈

歐陽華興 星日鄉人家貧織布爲業事親孝每獲利必盡市甘旨以進父病常刺指血作疏禱神願減己壽以益親壽鄉人賢之

楊永吉 星日鄉人少孤母何再醮趙氏生二子家貧吉迎歸奉養或輸

貲至趙助之農忙時攜牛至趙氏助弟耕作及趙姓二弟稍長代籌資斧營商仍隨時經理母卒迎喪歸葬楊姓業內

馮陞洵 名孔昭邑西金龜寺人也爲人誠樸不尙奢華生父馮正心弟兄五人年十六撫與胞伯馮正剛伯母劉氏爲嗣撫父身弱多病十數年飲食湯藥必躬親不敢稍懈撫母性剛間有笞責必下氣怡聲取親歡悅而後已至於生身父母之衣裙供養亦不敢或缺焉晚年延胞兄至家行坐不離其側胞弟三人早雖析居他鄉屢使人往顧並將己下分受產業與弟兄居耕每年錢租積欠已至數百釧數十石之鉅洵則慨然批簿取銷不忍重貲財而輕骨肉或有借貸毫無慍色洵壽八十一無疾卒

周照 增生事親有至性衣食言行曲體親心父性剛稍不如意輒叱怒

三台縣志

卷七

十四

三台新民印刷公司代印

照先意承志母氏李晚歲失明舉動多不適意照從旁寬慰及雙親歿置業建祠以祀昆季怡怡白首無間言長兄早歿嫂王守節無子撫照子以繼爲嫂請旌入祀節孝祠

王在和 邑北南溟鎮人力農興家管理兄弟家事三處克己和衆處事不阿父母在弟處約半里許晨昏必親問父母安好每有異食必先奉親而後舉箸壽七十六歲卒

尹起賢 縣北南溟鎮人母青年守志賢發憤苦讀以慰母心遂入縣庠從茲不事詩書寒煖飢渴必親手調理親有笑容則喜有憂容必見親和顏而後已鄉人士見伊盡孝純篤贈名起孝年八十五歲卒

唐世勉 字甦之縣北長樂鎮人五歲亡母十歲亡父族人涎產多受艱辛事晚母極孝晨昏必往問起居飲食必親手烹調侄孤撫若己子秉

心忠直善與人排解是非壽七十五卒

李慶元 字善齋母病癱元親爲着衣浴身數年不倦待異母弟情如一體

謝炳星 字紫垣邑北人由庠生列高等食餼同治八年母病紫垣朝夕侍奉服事愈謹母歿廬墓三年光緒四年父患瘋癱紫垣由省馳歸治養備至知縣王介卿虧空交代八千金上司追賠禍幾不測紫垣竭力營救事始解

羅少白 星日鄉人嘗語人曰吾有三樂耕也釣也讀書也因號三樂先生父顯臣以學教授鄉里行載郡乘先生行誼頗有父風父卒先生昆弟六人析筋以三四弟早喪令其侄坐鬪且爲之謀嫁娶門內偶有違言悉以大度容之辦邑中公益事莫不循分之所當爲邑令楊君耀珊

三台縣志

卷七

十五

三台新民印刷公司代印

稱其公正無私暇則游於桑麻釣於溪邊暑不袒裼冬不圍爐殆其真體內充翛然世外者歟

鄧永先 弟兄四人永先聯婚未娶諸兄謀析爨各分錢二十釧其母無人侍養乃娶婦迎母傭工養之嗣家日富享年八十二

鄭廷評 字子衡軫水鄉人母氏龔生三子而歿繼母蔡無出評父得風疾卒年僅五十餘評事蔡如事親生越二十年蔡卒評致敬致哀評弟鳳卒弟媳王無嗣評乃以次子維樑撫與鳳承祧然對於弟媳王之供養未嘗有缺鄉人爲之語曰千古無完人僅一鄭子衡五倫與八德克盡無遺行卒年八十長子維烈光緒時入邑庠

楊榮愷 事繼母孝弟兄異居奉養互相推諉愷獨任之迎養喪葬如禮
楊光浩 字希孟邑貢生母陳氏守節無子撫胞兄次子承祧卽光浩也

陳氏性嚴光浩遊庠食餼以至明經四十餘年稍有不合令跪受責毫無慍色生父卒時子女尙幼光浩爲之經營十餘年待其成立而後已

李天成 清明經事繼母孝逾六旬猶奉養如初

吳文品 字金三清封修職郎六歲失恃居憂儼如成人事繼母尤得權

愛卒年八十八

張守藎 字輔廷孝友聞於鄉里工詩文善言詞年七旬卒

張廷錦 字徊卿幼失恃事父孝卒年八旬餘

阮利國 字義生孝事孀母友于兄弟年三旬卒

張新憲 性純篤奉撫母以孝聞壽六旬卒

李發生 天性純篤母病躬親調藥晝夜不離待弟亦友愛

吳永淮 字桐柏邑西人父多疾事繼母劉孝養無違卒年七旬餘

三台縣志

卷七

十六

三台新民印刷公司代印

歐陽鳳 字儀亭邑西增生晚母欲害鳳鳳順而受之相安若無事久之

晚母自化愛同慈母家貧教學今二十一師團長歐陽賦生卽鳳次孫年七十四卒

歐陽鴻 字儀卿讀書聰穎過人父病篤半載未痊鴻親奉湯藥未嘗假手於人父歿鴻喪葬如禮又族衆好訟鴻議立祠規每春秋祭祠必與族人講演一次衆皆感化今六十餘年之久並未嘗有興訟者年六十七卒

呂作霖 邑西廩生素行清苦教學每歸侍親左右直至安寢未嘗入妻闈親病衣不解帶湯藥必親屢疏禱天減壽以益親父世祿逾古稀母鄭氏越花甲孺慕如初所獲學資悉與兄弟無一私積生一子卽離妻室十有餘年後子天乃偕寢母鄭氏卒哀毀欲絕三年不茹葷不共妻

宿其純孝如此

李全春 雙龍場人幼喪母家貧以傭值養親或與飲食無不留以進之
鄧成著 縣北人未讀書父早歿奉母以孝鄉人稱之

何聯賦 字子虛邑西庠生雨三之子父卒家貧如洗衣食皆艱晚母不
以爲子賦教學餬口人有所餽皆遺以奉晚母後晚母愛賦如己出年
五十六卒

劉榮政 牛金鄉人字玉衡善事親其母因事作怒榮政長跪自責母喜
乃起

熊長安 三合鎮人父卒家貧兄弟四人早析炊安販鹽爲業母偏愛兄
安不以失愛廢孝後兄弟各營鹺務多爲債累安獨獲利母愈惡之未
幾母疾安往問見輒詬罵常令其妻馬氏供奉酒肉母將死呼安至曰

三台縣志

卷七

十七

三台新民印刷公司代印

吾兒最孝異日必光門閭後安之子孫皆連鑣入泮安年六旬卒

黃祖福 字星五房日鄉人家貧性至孝棄儒爲人營貿凡親所欲無不
盡力羅致之甚至所得不敷復暗稱貸以奉生平無疾言遽色稍拂親
意其餘朋輩之以急難告者相助不遺餘力因之債重遂在外憂鬱而
死卒後尙懷手書以慰二親事在光緒二十四年

何文洲 字子泉邑西增生父盛涵主講中江進士李福源家後福源授
河南閩鄉知縣盛涵在署課讀文洲十二隨往涵卒文洲奉父柩歸葬
家資幾罄而奉母仍盡其誠邑紳歐陽榮重其孝行助以資使不廢學
年二十一遊泮就館歐陽祠側積有餘資輒以分潤諸兄弟及族姻之
困乏者卒年六十四

龔春肇 家貧父有洋煙癖少不給輒詬詈隨之除夕父索多金無以應

遂被逐並逐其母肇乃出居外舍爲小經紀節衣縮食得有餘息必歸其金於父終其身如一日後家漸裕年七十八卒

李希旦 志立子咸豐初志立派戍西藏且年十二耕於野領父之薪餉以濟其乏維時江南賊劇其叔父志舉堂叔志潔皆陣亡無人收骸骨且每思父輒嗚咽淚下繫懷三十年至光緒丙戌乃備行裝達打箭爐抵碩板多輾轉雪窖冰山迢遙數千里侍父生還子承駿入泮

鄧沿山 虛日鄉人紹桂三子撫與紹楷爲嗣紹楷六十三歲得癱疾不能行動沿山扶臥負起毫無厭倦如是者十年母勾氏年八十三亦孝養不倦年八十家口三十三人而沿山精神健康行步如初

陳鳳育 井木鄉人父琴軒年六十六患風症脚手不仁鳳育奉茶藥四年未嘗遠離凡衣服起居飲食便溺尤必親身扶持獨任勞苦卽有不

三台縣志

卷七

十八

三台新民印刷公司代印

得已之事外出必奉命允准而行咸謂其苦鳳育曰父昔生我德如山重我不報之何以成人父年七十歿

廖根先 邑人事母以孝聞四十年如一日爲人誠樸無他長對人無疾言厲色母年八十五卒先哀毀骨立數月亦卒時年五十三歲生平屢罹危險俱有異外救護人咸以爲孝感云

楊張純 字心一邑武庠也性誠篤以孝友聞好施與睦親族年十七佐其父伯嶽修宗祠期年告成己丑入武庠越年父逝心一哀毀常至昏迷季弟張鑾有女幼字羅江舉人米仁粟之子及粟任江蘇震澤令率子赴任所約俟弱冠時返川成禮殊十年不歸弟鑾因標梅失時嘖有煩言時心一年六十六親赴蘇探訪跋涉五千餘里住蘇二年始同粟子回川成禮其篤於友愛之情如此平居自奉甚儉待賓客備極豐盛

手置產業五六百畝弟兄叔侄有齟齬時心一恆爲排解渙然冰釋某年歲饑鄉人舉爲辦賑首事盡發積穀猶不濟心一復自捐穀數十石所全活甚衆卒年七十有八歲

王章映 兄嗜飲博財力難繼與弟析居已取四分之三留一與章章但請與耕牛一遂力農養親後兄入廛居久而家罄章爲之賃田宅辦婚嫁葬嫂氏終身友愛不衰云

閔光斗 字星垣邑西文生教學餬口三兄開寅光緒間負債數百金爲債戶所苦欲自縊是時斗與寅分居多年斗獨任寅債罄歷年館穀給之年六十八卒

王成璞 字美中性友愛幼時家失火父欲蹈火死美中號泣挽慰乃止父母歿後家產僅三百緡弟兄四人佃耕俱精於穡事長兄成綜嗜畧

三台縣志

卷七

十九

三台新民印刷公司代印

粟不理家事美中亦不以事相累且使衣服飲食稍異於家人嘗謂兩兄曰長兄如父彼一人逸我三人勞何事不成若分則勢孤恐均無以餬口以故食指雖繁絕不言析爨族人稱曰難兄難弟

廖信煥 字有文大石岡人弟兄五人信煥居季初家貧信煥赤手創業百餘畝因弟兄生齒日繁析居後信煥家日起又出錢千餘緡三次分潤諸兄邑令張政曾贈以匾曰孝友可風

鄧祖富 嘉慶時黻火鄉人治家有法內外和順待弟祖貴祖榮祖華祖祿及侄履道亦甚慈愛同治間五世同居添丁至一百三十餘人各執一業咸守家法和順雍睦毫無間言光緒丁丑學憲譚宗浚贈雍睦可風匾額聯云五代同堂四節婦百餘共處一義夫

景宗璠 軫水鄉人次弟瑜季弟瓚家貧其父紹元訓蒙餬口以瓚出撫

吳姓臨終囑璠瑜弟兄曰異日稍裕無忘汝弟遂歿後十餘年璠瑜發憤經營積資買業竟出百金向吳姓贖贖歸宗平分家產光緒中璠子入泮

張開猷 箕水鄉人父洪德母林氏生四子開猷開富開倫開嵩猷少時家負重債迫不聊生父欲賣產開猷泣諫曰二親如欲賣產但賣田地房屋不賣可乎母曰汝意若何猷曰田雖賣有子以供父母若房屋賣盡兒日出營生至晚無家可歸兩親作何安置母曰如此並田不賣也可嗣是開猷開倫在家理農業開富開嵩赴省就絲行家業驟興男婦大小七十餘口四世同堂民國五年知事張賜孝友可風四字匾額卒年七十一

李恆升 軫水鄉人與胞兄別居兄家貧無力謀生嘗出己積六百餘緡贖兄業歸起居飲食未嘗或離來往市廛尤必徐行後長卒年七十有五

楊宗槐 邑西農人幼貧勤耕儉積以致富光緒三年歲大饑諸兄弟不能舉火者皆依槐爲生活又親族貧而壯者給金令其貿易謀生受惠之家甚多年七十一卒

李克第 觀音橋人咸豐十一年藍逆擾境其兄克翔被賊擄去數月未歸克第念兄情切兼以母氏憂思乃跟蹤尋兄冒險屢入賊營後竟兄弟同歸

王璆 字重品幼遵孀母繆氏訓篝燈夜讀長遊庠母病侍湯藥衣不解帶母卒居喪次哀毀骨立未白日而麻衣以殉鄉人慟之

劉文明 尾火鄉人少貧窘傭於龍安獲微貲乃返里業農而諸兄及堂

弟侄十餘人皆流散無後文明使依己以生死爲封墳豎碑而命己之子孫掛掃後其子榮慶孫濱皆遊庠人以爲友愛之報云

湯文林 天性渾樸日事農業父母早卒奉兄如父每有議婚者輒以次兄未娶辭後次兄遠出無耗爲長兄阻不能尋遂終身不娶撫兄子承祧

成啟宣 事母孝旣分析獨任供養不與兄弟計較弟侄有缺乏者常分潤之壽六十五

楊世宦 事親孝待異母弟如同胞享年七十八

蕭秉鈞 邑西宿儒學敏子事母甚謹兼有果敢才先族巨人繁每年訟事至二十餘案秉鈞憂之因倡首立祠規興祠會以嚴戒訟端族衆無敢犯者年七十卒

三台縣志

卷七

二十一

三台新民印刷公司代印

梁和然 弟慨然以兄子爲鄉豪所毆謀雪恥於金翔山二月會集日伺其來狙擊之至死自首於官爭死公庭官坐其兄罪戍邊遠地弟棄家徒步從之兄死負骨以歸

諶殷誠 婁金鄉人性孝友弟兄五人誠居末四兄俱貧無力供母生養死葬皆誠獨任妻于氏性賢淑亦勉力佐之無厭意長嫂張氏偕四兄誌遷漢州長嫂亡誠爲運喪回鄉改葬復迎回四兄及嫂氏龍供養不懈及兄嫂後誠繼亡其子亦能體父志如禮葬之誠三兄子世華傭工未娶誠收歸合爨爲華受室生二子以承兄祧誠享年六十有八

張守蒸 居父喪日夕哀泣雙目失明弟早亡常捐金恤之

羅登典 弟登友被盜團衆查抄盜巢擊斃二賊官以命案處究登典代弟當失盜主受刑守法毫無怨言且庇本保團甲無事壽七十八

鄧麗成 文興長子年十五父歿叔繼逝祖年六旬餘成克承先志家累萬金有弟三麗成獨持家政人歎其勞迨諸弟完娶詎諍頻聞諭之不可乃閉門自責其不能友弟何以對先祖先父與叔父耶娣姒聞之翕然相睦

鄧寶 龍樹場人弟兄四人中年分居弟歿侄幼初弟質田與寶及侄成立以券還侄并不索壓錢

歐陽華高 字魁榜牛金鄉人弟兄六高行五家百餘丁道光時歲大荒人衆務繁獨力難支乃析產至拮据後兄華燦稱高所得田地肥沃房屋高闊連聲稱道高悟兄意將已得之鬮讓於兄華燦初猶不受高如是者三燦方如所請高毫無慍色人詰之高曰天下難得者兄弟易得者田產假如得田產而傷手足又何貴乎夷齊猶且推位讓國何況我

三台縣志

卷七

二十二

三台新民印刷公司代印

庶人之產耶詰者大慚鄉內某弟兄爭田訟久不決聞高事甘願息訟高年七十八卒

周先著 牛金鄉人與兄先芳居處及分析田產取三分之一餘業與老宅概歸於兄已移小龍橋取瘠地居焉

陳萬國 井木鄉人昆弟六萬國居次兄萬喜故國教其子如己出次侄乏嗣爲之助金續絃待遇諸弟侄雖屬析居事無巨細皆統理之家七十餘人無不嚴守規矩且喜做慈善事

梁崇忠 字蓋臣翼火鄉人奉母諶氏克盡孝養事父妾亦誠敬如母弟兄四人分爨崇忠理家復合毫無間言其二兄崇悌病劇常侍側不離左右洩便皆忠扶抱如是數月無難色崇悌卒無嗣忠爲撫長兄子華蒔以嗣

李明杞 建林驛人父笈早逝叔箒撫杞成立箒子八長而析產杞請叔將產析作九箒堅持爲二杞邀族戚建議箒仍不允後議析爲三始准行里有治瘋狗藥方其效如神秘而弗傳藉此獲厚利杞以重金得其方遂按方配藥普施於人又每屆歲暮見有苦寒疾病必以衣米濟之李鴻璋 建林驛人父興貴母氏廖璋僅四齡母故育於兄嫂長兄儀病數年醫藥罔效璋侍湯藥無倦容光緒二十七年秋儀卒喪事畢送柩出返卽自盡時年甫十八

彭坤忠 父乾恩母劉氏忠未週歲母故繼母陳生弟六人均幼未幾父辭世家僅二百餘金佃業以耕忠以一身內外經營歲歉齒繁日用不敷忠又販布以濟不足繼母辭世營葬從厚俟弟成立完婚後始憑族戚析居

三台縣志

卷七

二十三

三台新民印刷公司代印

李仁根 翼火鄉人道光時文生教人以孝弟爲首務弟兄五人極貧析居後仁根稍積餘貲又收諸弟一室同居後家益豐弟兄友愛益篤王澤多 號祝三翼火鄉處士爲人好善常施茶藥棺木幼失怙恃嫂鞠育之長遂呼嫂曰嫂娘凡事必諮嫂而後行及嫂老病如母事之藥必嘗而始進嫂歿廬墓期年

李遠修 號慎之翼火鄉處士甫半歲母許氏歿後二年其父永朝亦亡兄遠華保抱携持友愛備至修長亦篤愛其兄朝夕弗離嘗有句云半歲仃伶誰似我一生友愛孰如兄光緒乙卯華物故時修年三十三不茹葷飲酒年餘嘗觸事悲吟作哀鴿草三百篇壬午春服闋有句云同居一室生無望相會重泉死或然自是抑抑不樂親友勸之亦弗釋至九月病篤時忽囈語云兄猶無恙耶遂卒

顏代慶 弟兄三人分爨十餘年伯兄仲兄諸子侄落魄爲之償債清光緒十七年命子侄輩十五人仍合居一堂甘苦與共嘗曰外人貧苦尙當賙恤况兄與侄乎

潘世祿 學名子培字植堂由潼聯中學及省立軍官學校畢業屢從劉軍長賴軍長與滇人戰累官至連營長行軍紀律嚴肅所至不擾幼時從中江曾伯和先生講性理學深有心得從軍後累任局所事必迎母至署朝夕侍坐色笑如兒時恂恂謹飭惟恐不能稱親之意昆弟四人推分達情怡然得天倫至樂年三十二戰死天迴鎮鄉人惜之

安自德 嘉慶時人年十九母宋病篤自德剖胸割肝調藥以進母食之而愈自德傷洞內長三寸而卒無恙知縣沈昭興旌其門曰愚孝格天且爲文以紀之

通志

〔邑令沈昭興撰安孝子小傳〕安自德者邑之南鄙人也質中人而性誠篤嘉慶丁卯年十九母宋氏病篤百藥罔效德仰天祝告引刀割胸出肝切一葉調湯以進母食之而甘德負痛出顏色慘變兄嫂咸怪之德以實告且曰切勿令母知視其傷已洞內血如泉湧急敷以藥詰朝母疾漸愈未幾而德亦無恙族鄰白於予予召之來解衣驗之刀痕宛然長三寸闊半之此而不死非神助耶因詔之曰汝讀乎耕乎曰耕余曰嘻是無足怪也禮父母有疾嘗藥以進衣不解帶經曰身體髮膚受之父母不敢毀傷孝之始也爾何以割肝爲耶幸爾母不知食之而愈爾亦徼倖不死耳設食之而不效或知之而益病或爾因傷而斃焉是求孝而反成不孝矣君子事親不肯出此非惜身也恐傷親心也雖然爾愚夫烏足以語此但跡爾心固可以格天神而維風俗矣因獎以金

帛製愚孝格天四字匾額以旌其門並書一聯以勵之曰立心固可維風俗至孝應毋毀髮膚德叩頭曰小人聞命矣今願讀余喜令從學三年文理恂順應童子試若矢志弗衰當有成也

何明基 邑南鄉人父早卒基傭工養母母病篤割股以愈後七年母氏歿不茹葷酒終身不娶負母遺杖見神必拜祈禱以資冥福藍逆之亂負杖走賊追及問得其故曰此孝子也舍之去邑侯張瑞麟書匹夫純孝四字榜其門貢生陳謙以詩紀之云君不見孝子何明基孺慕之誠老不瀆厥家有母貧且寡竭力傭作療其饑偶得甘旨卽奉母母心樂矣兒始怡嬉膝下博歡笑啞啞不聞烏夜啼娶妻以爲養何如自爲養起居謹扶持穢污廁踰親滌蕩老病垂垂溘然死割股無裨悲不止強具棺槨起墳瑩旦夕招魂紛剪紙母雖云亡母杖在負杖如母弗離

三台縣志

卷七

二十五

三台新民印刷公司代印

乃願母托化生人天懇祈冥福說共採傳聞眞武住武當又聞觀音宅南海崎嶇萬里事行役伶仃負杖淚雙落竺王頂禮徧諸方始向山中駐行脚吁嗟乎蘇武節不忘君孝子杖不忘親不慮不學純任天真過而問者眈隸村氓於今大耋力尙康猶擎母杖意徬徨縣官聞名嘆未有親遣儀衛登其堂閭里之榮邦家光紛紛傳說樂無央聞風百世亦興起况乎同時又同鄉

府志

陳紹剛 字小濟年十七祖母病劇剛割股和藥以進病愈又何景富王照映馬萬林俱以割股療祖疾稱孝孫

府志

邱文秀 本姓劉幼喪父母同邑邱泰撫爲子文秀事如所生乾隆間父病篤割股和藥以進卽瘳後病復發亦如之妻羅氏姑病心痛甚劇亦割股以進卽愈郡守張松孫書愚孝可風四字表其門鄉里稱爲邱孝

楊臻 父病危臻焚香祝天割股以進父病稍愈復延數月乃卒

廖順修 母病篤聞古人有割股之風慕而效之雖以沉疴不克起然一念之誠亦未可泯也

何朝聘 母病不起百藥罔效聘割股以進獲痊鄉里稱之

李時芳 邑庠生李毓泗子父病篤百藥罔效因割股以進病遂愈又數年乃卒

金永孝 邑庠生金永遠之弟年十六其父病半載百治不能愈一日父思得鮮肉湯孝卽於無人處割腕上肉一臠煎湯以進父飲之而家人未之知也至次日瘡浮腫流血有痕始知其有割股事 以上俱舊縣志

王元泰 室火鄉人道光庚寅其父寢疾百藥罔效奄奄就斃元泰默禱

三台縣志

卷七

二十六

三台新民印刷公司代印

於神割左手臂肉湯以進疾旋愈同治癸亥覃恩旌表孝義郎

李正明 劉家營石鼓壩人家貧爲人傭工母氏王年近七旬久病不愈正明於同治八年七月十五夜焚香割肉奉母食之母病愈又年餘乃終

萬位先 邑南紫火鄉人家貧傭耕未讀書而有至性同治辛未年曾割股以愈母病後祖母及父病割肝以進均得愈鄉人咸以萬孝子稱之云

〔邑舉人王龍勳撰萬孝子事略〕萬孝子位先三台紫火鄉人明舉人谷暘其八世祖也家赤貧佃耕傭作雖目不知書而愛敬出於天性父國治投固原軍久不歸位先竭力奉母暨祖母孝養弗少懈同治辛未母氏王病篤位先割左臂煎湯以進立愈光緒丁丑祖母楊病臥牀蓐

者三年庚辰四月病益劇位先靜夜焚香祝於家神前持剃刀割右脅取肝一指和羹以進祖母痼疾不藥而起十二年丙戌國治在甘夢母告以位先割肝事怦然乞歸詢問得實又慟已不得終養憤鬱成疾至戊子冬幾殆位先又割左脅取肝以奉逾日亦瘳厥後母歿於同治甲戌祖母歿於光緒癸未父歿於光緒辛卯距病愈均適三載無疾而終嘻異矣位先樸野少文一邨氓耳然聞其性好善足不踐蟲螻暇則荷竹簾見殘字拾之傭工所得肉羹必歸以遺其平日跬步不忘固有非出於勉強者抑又聞位先未割肝前嘗禱神斬減壽益親當割之時屢若有神導之相之以爲親非是莫救爰不自愛其身迫而爲此其事雖近愚其志實可哀也已前邑侯翟公本初賜額旌之曰至性格天李公發榮賜額旌之曰孝感里閭提學高公賡恩復賜額旌之曰馮臺繼起

三台縣志

卷七

二十七

三台新民印刷公司代印

皆稱其孝行可嘉著由學牒申以次詳請入奏此其爲一邑之光何如今窘窶無狀深懼宗祀隕越鄉人好義者謂是曷以勸善謀釀金爲之所並屬龍略述其梗概用呈當代鴻儒大筆表彰俾異日采風者得有所據焉以上參府志

唐宏山 字松茂尾火鄉人家業不順火焚三次負債甚重母多病宏山十二歲與王姓牧牛離家二十里早去晚歸歷三載遂還家販油奉母數年母舊疾忽發頭昏身痛醫藥無效遂禱於神冬月十九日夜靜時以刀割肝細切煮羹奉之佯言羊肝可以愈疾其母以爲眞服之病愈於是遠近爭傳稟官驗傷屬實翟縣令賞賚有加又書孝感天神匾額賜之請旌准予題名建坊

李崇林 同治五年父病不愈割股療之遂瘳

王斯昭 父年七十餘患病斯昭割肘肉以治之

王如玉 父病篤兩次割股療之尋愈繼母羅風癱五載奉養如一於手足友愛尤至

楊同善 魁金鄉木工也父患痰疾年餘適歲饑禁屠父思肉同善割股奉之

蔡正春 龍樹場人家貧父病危割股以進

龔興灝 龍樹場人父病篤時割股以進尋瘥

賈廷選 治西人家貧其父病久思肉遂割股肉奉之父病以愈選年七十卒

王昌柏 南鄉人家貧日則傭工夜則操作人與酒肉必留以奉父兩次割股療父疾皆愈越數年復割肝救父父病愈而昌柏死

三台縣志

卷七

二十八

三台新民印刷公司代印

古相材 年二十九父病願以身代扶持月餘病危時割股以進父未食而卒

左光明 幼喪父隨生母黃適左事繼父左龍仙暨諸兄諸弟皆以孝友聞至光緒辛丑繼父生母先後寢疾流連不愈光明齋戒沐浴焚香竈前割左股烹奉雙親病皆痊生母繼父均享高壽

李光岱 翼火鄉李遠照子光緒二十一年父病危篤岱於竈神前默祝以身代死復割股和藥以進父食之頓愈踰十年其父八十有九始歿人以爲孝德之感云

周德明 字維馨光緒甲申五月十三日母病垂危聞人言人肉能愈遂割左臂臠肉以進病果愈

任大亨 繼母病割股以進而病愈享年九十三

胡家友 字德源蘇河場人清光緒乙未年十六母羅氏病天旱禁屠母欲啖肉德源於竈神前割股三寸以進病遂愈民國九年知事張政贈以宗族稱孝四字

張守傑 家貧教學割股奉母享年七十八

曾國友 事母至孝母病難愈卽割股以療之享年七十

曾懷德 宣統三年母鄒氏病懷德割股奉親以愈團保以聞是年八月禮部發給執照授八品職銜准入忠孝祠

賈興科 治西人務農力食母病篤割股肉烹之以進母病遂愈後數月母病復發科兄興珍亦割股以進

林嗣芳 婁金鄉人年四十母患病割股肉三寸烹以奉母病遂愈鄉人稱之年九十二卒

三台縣志

卷七

二十九

三台新民印刷公司代印

賴大海 魁金鄉人幼孤貧爲人傭工母年六十臥病半年大海將股肉割二寸許以奉母而病愈

鄧大海 婁金鄉人母年七十病風久不愈大海情急割股肉和藥奉母病遂愈

李宗周 前清國學生母文氏患病宗周割股肉和藥以進母啖之病愈
李宗和 尾火鄉人家貧多病因入道門棲鶴觀音橋之廟光緒三十二年母秦氏病數月宗和薰沐焚香割股以進母病遂瘥事聞知事黃公題有誠孝可嘉匾額並贈孝義郎

呂應容 星日鄉人目不識丁母病篤應容在肋割肉一片和藥以進母病旋愈

孫孝元 翼火鄉大悲閣人母許氏年五十八常患心疾民國甲寅冬孝

元年十四割胸肉烹奉其母疾尋愈

徐盛海 業石工母病垂危割乳旁肉以奉之病果愈

許三楨 觀音橋人母病割股合藥以進卽愈

唐興澤 參水鄉人母楊氏家十餘口賴父舌耕存活父卒母憂傷成病且喪明醫窮於術興澤年十六救母情切割左股以進母疾旋愈目亦復明

景聯泰 氏土鄉人講聖諭以勸善邑令奎榮賜以八品頂戴母病篤割股以進病遂愈年六十餘卒

唐時純 邑西人夙秉母教性至孝當母病困時羣醫束手純年幼聞人言割股療親事輒暗割股肉一片和藥以進母病果愈後因更衣母見其疤痕問之猶借他故以掩飾之其至性如此前大總統馮褒以宗族

三台縣志

卷七

三十

三台新民印刷公司代印

稱孝匾額

陳紹泰 邑之東鎮人母王氏病危泰剖胸割肝煎湯進之初託言賣糧購肉既而兄嫂怪其色慘變泰以實告視其傷已洞胸血濺衣急延醫治之母疾旋愈泰亦無恙

尹明達 縣南商人童時母病篤百藥罔效聞人言人肉可治情切救母割左胯肉和藥以進母食之病旋愈

劉興龍 本城人因母病篤割右臂肉以奉母病卽愈

顏永興 邑西神仙橋人母病年餘未愈興割股奉之竟愈

羅崇瑄 治南尾火鄉人母疾曾割左股以奉母母疾旋愈

唐守勳 舉家遭疫惟父病尤烈乃割左臂肉進奉父病立愈

王履事 字敬其三合鎮人祖伯萬年六十三染疫醫治無效敬其割股

和羹以進數日病遂痊

唐泰霽 邑南星月鄉人處士蔚豐之長子泰霖係第三子兄弟六人俱仁孝而霽與霖性尤篤摯霽於民國八年己未冬適祖母左八十有二偶染重恙神藥罔效霽思幼蒙祖母撫育乃於十二月初二日沐浴齋戒至本境四方井城隍廟內默禱割胸左乳上肉烹奉祖母病即愈又民國丁卯春霽棄世生母忽發背癰徧覓名醫無效霖以長兄病故母遇奇災常患於心竟效兄行於陰曆三月初六日沐祝竈神割胸左乳下肉不令人知調奉生母以代湯藥母病亦痊鄉鄰察其實情呈報縣署一門雙孝鄉人稱之

譚大昕 字曉堂邑南觜火鄉人年十八入邑庠父早卒家貧以教學奉母饗殮母病刲股得愈如是者凡三次母卒廬墓三年兄弟三分居有

三台縣志

卷七

三十一

三台新民印刷公司代印

年死爲之殮所遺子女悉撫養男爲之娶女爲遣嫁於侄孫女亦如之平日教學以宋學爲宗先品行而後文藝一方士林咸宗仰之

此外張調宇杜秀峯劉先慎吳先明蘇才上田見龍田寶身杜文龍趙山涂聯品周述坤何國仁何國相李安所林興仁文禮阮永昌張先貴張乾順李瓊成趙榮高李耀山林天萬左龍元余思九余世發王彰信何載山何三元童明尹二星于仕松趙新希諸人皆以割股療親疾見稱者

參新舊縣府志